



Inatsisartunut ilaasortaq
Doris Jakobsen
Siumut

Ilinniarnermut atatillugu taarsigassarsisarneq pillugu § 37 naapertorlugu apeqqummut nr. 2011-12-imut akissut

Asasara Doris Jakobsen

Naalakkersuisut apeqqtinnut ataani allassimasunut matumuuna akiniakkannut qujapput:

Ilinniartut 18-it inorlugit ukiullit, ilinniarnerninnut atatillugu aningaasanik attartorsinnaanerit periarfissaalerniarnerluni?

Ilumoorpoq ilinniartut Namminersorlutik Oqartussanit ilinniarnermut atatillugu taarsigassarsinarunik 18-inik ukioqalereersimasussaammata.

Inuusuttut 18-it inorlugit ukiullit ilinniarnermut atatillugu taarsigassarsisinnaannginnerannut siullermik pissutaavoq inuusuttut 18-it inorlugit ukiullit ukiukitsuunerat. Tassa inuit 18-it inorlugit ukiullit katissimanngitsut nakkutigineqartullu. Meeqqat inuusuttullu taakku oqartussaassuseqanngillat. Tassa imaappoq pingaarnertut isumaqatigiissuteqarnikkut aningaasaqarnikkut imminnut pisussaaffilersinnaanngitsut pigisaminnullu aalajangiisinnaanatik.

Oqartussaassuseqannginnerup tamatuma nammineq pisinnaatitaaffinnut tunngasunik, ass. pituttuiffiusumik isumaqatigiissuteqarnikkut namminneq aalajangiinissamut iliuuseqarsinnaannginneq nassataraa. Oqartussaassuseqartitsinnginneq pillugu malittarisassani siunertaavoq inuit oqartussaassuseqanngitsut aningaasaqarnikkut annaasaqannginnissaat. Pineqartut namminneq aningaasaqarnikkut isumaqatigiissuteqarnissamut pisinnaatitaanngillat.

Oqartussaassuseqanngitsut inatsisit malillugit pisussaaffii pingaarnertut atuunneq ajorput taamaattumillu taakkununga pisussaaffiliiffiusinnaanatik. Inuusuttut oqartussaassuseqanngitsut akiitsoqalernissamut pisussaaffilersinnaanngillat taamatullu aamma ass. akiligassarsisoqarsinnaanani.

Tamatuma kinguneraa Namminersorlutik Oqartussat ilinniarnermut atatillugu taarsigassarsinermut atatillugu inuusuttunut 18-it inorlugit ukiulinnut pisussaattisisinnaannginnissaat. Taamaattumik taarsigassarsinissaq pillugu isumaqatigiissutit taama ittut atuutissanngillat taamatullu aamma Namminersorlutik Oqartussat taarsigassarsianik taama ittunik taarseeqquisinnaassanatik.

21. januar 2011
Sagsnr. 2011-044291
Dok. Nr. 544235

Postboks 1029
3900 Nuuk
Tlf: +299 34 50 00
Fax: +299 32 20 73
Email: kiin@nanoq.gl
www.nanoq.gl

Tamanna aamma ilinniagaqarnersiutit pillugit inatsisip kingunerinngilaa oqartussaassuseqarnerli pillugu inatsisip kunngip peqqussutaatigut nr. 306-ikkut, 14. maj 1993-imeersukkut Kalaallit Nunaanni atuutilersinneqartup kinguneralugu. Oqartussaassuseqarneq pillugu malittarisassat ilaatigut inuusuttut misilittagaqaratik aningaasaqarnikkut, inuusuttut isumagisinnaanngisaminnik aalajangiinissaat pinngitsoorniarlugu illersuinissamik tunngavilersorneqarput. Inatsisitigut pisussaaffeqartitsinnginneq pivoq inuusuttup pigisaminik, isertitaminik aningaasaqarnikkulluunniit soqutigisaminik allanik ulorianartorsiorititsinnginnissaa ajorseriarujussuartitsinnginnissaluunniit, imaluunniit aningaasaqarnikkut atorneerluisoqannginnissaa pillugu.

Tamanna tunuliaqutaralugu inuusuttut 18-it inorlugit ukiullit inatsisitigut pisussaaffeqarnermut atatillugu aningaasaqarnikkut pisussaaffilersinnaanngorlugit Naalakkersuisut inatsisitigut tunngavigineqartunik allannguinnissamut suliniuteqarnialersaanngillat.

Inussiarnersumik inuulluaqqusillunga

Mimi Karlsen